

zu handeln/vnd dem vngeübten vnd vnuerstendigen Leser/auffs aller einfeltigst / klerlichst
vnd verstendlichst/aus dem rechten gewissen grund / zu gemeiner einleitung der scharpff-
fen hochverstendigen Bücher Vitruuij/im Truck/gutwilliglichen mit zu theilen etc.
Dieweil aber der hochverstendig vnd vilerfaren Architectus Vitruuius/sein Bücher vnd
Schriftarbeit also hoch gehalten/das er siewirdig geachtet/dem Großmechtigsten Keyser
Julio erstlichen/vnd hernach Augusto/als ein trefflichs geschenck/vnd herliche gab/zu son-
derlicher erzeigung der danckbarkeit/aller entpfangner gutthat/zu Dedicieren vñ vnter di-
ser beider Römischē Keyser herlichen namen/ vnd hohen ansehen/ zu publicierē/Welchem
altherkommenen/löblichen brauch/auch alle dieselbigen/welche dise herliche Bücher/in man-
cherley frembden sprachen Transfrieret/vnd auch weiter von der Architectur angehörigen
künsten/geschriben/vnd gehandelt / noch bis auff dise yesige zeit/ auch weiter nachkomen
vnd erhalten/also das sie ire scharpffsinnige Speculation/vnd was sie vermeint/ gemei-
nem nutz vnd aller fleissigen Künstler wolart/fürderlichs vñ dienstlichs erfunden zu habē/
dasselbig den mechtigsten Potentaten/zu Comendieren/vnd das hohe vnd groß ansehen
derselbigen/als ein starcken Schutz/vnd mechtigen Schirm/zu setzen / irer angewendten
mühe/solcher Schriftliche arbeit/Hab ich abermals nit gezweifelt/inen in solchem ehrl-
ichen Exempel zu folgen/derhalben auch E. F. E. W. als sonderliche Hochgelerte/Hoch-
verstendig/Fürsichag/vnd Weise Herren/welche nit allein in allen ehrllichen/ vnd hochlöß-
lichen künsten/gnugsamlichen erfaren/vnd mit vilfältigen herlichen vnd trefflichen gaben
Gottis/reichlichen geziret/vnd hoch geehret/sonder auch aller ehrllichen löblichen Künste
getreueste / müteste/vñ Väterlichste erhalter/auffbringer vnd beschirmer/auch aller höch-
ste Mecenatez vnd Patronen sind/in sonderheit zu eruelen/die Verteutschung vñ geord-
neten Commentarien der Architectur Vitruuij/ desgleichē auch andre besondre Bücher/
darin der Architectur angehörige kunst/auffs verstendlichst gehandelt werden/vnter E. F.
E. W. herlichen vnd rühmreichen namen/in Truck zu verordnen/vnd zu vilfältigem vor-
theil vnd nutz allen kunstliebhabern zu publicieren/Dañ dieweil E. F. E. W. sonderlich
freundlichgemüt / vnd wolmeinung / gegen allen denen / so auch in geringen dingen/
gemeinem nutz vnd wolart zu dienen ye vnterstanden / yederman kundt / wie dann auch
E. F. E. W. Gotgefellig/glücklich vnd fridlich Regiment vnd recht wolgeordnete
Christliche Policiey/gnugsam anzeigen/so von yederman furnemlichen als ein sonderliche
rühmstadt/erhaltung vnd auffbringung aller kunst tugent/Ehrllichen/Künstlichen vnd Löb-
lichen sachen / ye vnd ye hoch gelobt / vnd nit wenig verwundret worden / zweiffle ich
nit/es werde E. F. E. W. dise geringe gab solcher Schrift arbeit angewendter mühe/gut-
williglichen von mir auffnehmen/verhofflich genslichē/ es werdē solche Werck vnter E. F.
E. W. hohem ansehen vnd herlichen namen/allen Kunstliebhaberen desto gefelliger / vnd
angeneher sein/Wa ich dasselbig spüren werde/bin ich genslichē des erbietens/hinsur kein
fleiß oder mühe zu vnterlassen / alles dasselbig/was in disen/vñ dergleichē/gemeinem nutz/
vnd allen Kunstbegirigē/ vortheilig vnd fürderlich sein mag/gutwilliglichen nach meinem
höchstem vermögen an tag zu bringen. Damit E. F. E. W. dem Allmechtigen Got/
der aller Obigkeit verstande vñ Weisheit gibt / in seinen Schirm vnd Schutz beselhend/
Der Regiere/Schütze vnd Handhabe/E. F. E. W. zu seines Göttlichen namens Ehre/
vnd Gemeines Vaterlandts nutz vnd frommen.

E. F. E. W.

Vndertheniger

Gualtherus H. Riuius
Medicus.